

इवनिंग डोगरी न्यूज बुलेटिन

समे .18:15 Hrs

<><><><><><>

## Headlines

1. लेफ्टिनेंट गवर्नर मनोज सिन्हा होरें आखेआ ऐ जे जम्मू-कश्मीर दी अमन-शांति दा आधार बलिदान, नैतिकता ते गल्लै-कत्थै आहली प्रक्रिया ऐ।
2. जम्मू-कश्मीर दे किश्तवाड़ च इसलै आतंकवादिएं ते सुरक्षाबलें बश्कार टाकरा भखे दा ऐ। पुंछ च तपाशी अभियान जारी।
3. केंद्री मंत्री डॉ. जितेंद्र सिंह होरें दस्सेआ जे 25 लक्ख शा बी मते लोकें डिजिटल जीवन प्रमाण पत्र बनाने लेई अपने मुहांदरे दी फेस आथेंटिकेशन प्रणाली अपनाई ऐ।
4. सिख धर्म दे संस्थापक श्री गुरु नानक देव जी हुंदा 556मां प्रकाश पर्व गुरुपुरव अज्ज पूरी धार्मिक श्रद्धा ते जज्बे कन्नै मनाया जा'रदा ऐ।
5. बॉलीवुड अभिनेता सुनील शेट्टी होरें औंदी 9 नवंबर गी जम्मू सीमा-सुरक्षा बल मैराथॉन दे उद्घाटन च हिस्सा लैने लेई लोकें दा आह्वान कीता।

<><><><><><>

## LG-Peace

उपराज्यपाल मनोज सिन्हा होरें अज्ज आखेआ जे जम्मू-कश्मीर दी अमन-रमानदारी ते तरक्की दी नमीं यात्रा अननिगत लोकें दे बलिदान ते भारती संतें दे कद्दे नष्ट नेई होने आहले ज्ञान पर आधारित ऐ जिनें सखाया हा सच्ची शांति, दया, मित्री ते गल्ल-कत्थ रायं स्थपित कीती जाई सकदी ऐ। श्रीनगर च शेरे-कश्मीर अंतरराष्ट्री कन्वेंशन सेटर एस.के.आई.सी.सी च लग्गी दी अंतरराष्ट्री सतह दी संगोष्ठी गी संबोधित करदे होई एल.जी होरें आखेआ जे जित्थे लोक मान-सम्मान, आपुं च गल्लकत्थ ते इक्क-दुए गी इज्जत मान दिंदे होई रौहंदे न। संगोष्ठी दा सिरलेख हा जम्मू-कश्मीर च अमन-रमानदारी, लोक ते संभावना। श्री सिन्हा होरें आखेआ जे शांति दा मतलब ऐ जे हर कोई जना बिना कुसै डर-त्राह दे अपनी मन--मर्जी मताबक आजादी कन्नै रेई सकै ते आम लोकें दे जीवन च उंदी गरिमा उन्दे कम्मं च ते मौकें पर लब्बदा ऐ। उनें गलाया जे आम कश्मीरी सख्त मेहनत ते सांझी तरक्की रायं इस शांति गी नमीं शकल देआ करदा ऐ। श्री सिन्हा होरें लोकें अगगे अपील कीती जे ओह नियम-कायदे, साथ-सहयोग, दया ते आपसी भाईचारे दे मुल्लें गी बनाई रक्खन। उनें नोजोआनें गी कट्टरपंथ ते नशीले पदार्थ थमां दूर रौहने लेई आखेआ। श्री सिन्हा होरें आखेआ जे अज्ज बी किश लोक पाकिस्तान समर्थित आतंकवादियें दी भाशा बोलदे न ते ऐसे तत्वे दी शिनाख्त कीती जानी लोड़चदी कीजे देस जम्मू-कश्मीर बक्खी दिक्खा करदा ऐ।

<><><><><><>

## Encounter

किश्तवाड़ जिले च अज्ज बड़लै आतंकवादियें ते सुरक्षा बलें बश्कार टाकरा होआ। अधिकारियें दस्सेआ जे जम्मू-कश्मीर पुलिस कन्नै रलियै व्हाइट नाइट कोर नै थोई दी खुफिया जानकारी दी विनाह पर इक अभियान रम्भ कीता जिस दरान उन्दा आतंकियें कन्नै टाकरा होआ। घट्टोघट्ट 3 आतंकवादियें दे टाकरे आहली थाह पर होने दी शँका ऐ। टाकरे च इक्क जवान दे ममूली तौरा पर जखमी होने दी खबर ऐ। तोआई, पुंछ जिले दे सरहदी इलाके च शुबे आहली नक्लोहरकत दी जानकारी थोने परैंत सुरक्षा बलें तपाशी अभियान चलाया। दस्सेआ गेआ ऐ जे बालाकोट-मैंढर सरहदी इलाकें च संदिग्ध जने दी सूचना थोने मगरा एह टकोहदा अभियान ए.ओ.जी, सेना ते सी.आर.पी.एफ नै सांझे तौरा पर रम्भ कीता। सुरक्षा बल हाई अलर्ट पर न ते मकामी लोकें गी अपने इलाके च शुबे आहली कुसै बी नक्लोहरकत दी जानकारी सांझी करने दी अपील कीती ऐ।

<><><><><><>

## Bihar

बिहार च औंदे विधानसभा चुनाएं दे पहले गेड़ ताई लोड़चदियां सब्भै तयारियां मुकम्मल करी लैतियां गेइयां न। कल संगारे 6 नवम्बर गी पहले चरण च 18 जिलें दियें 121 सीटें लेई वोट पाए जागंन। इस गेड़ च 1 जहार 314 मेदवारें दे भागें दा फैसला पंजीकृत 3 करोड़ 75 लक्ख शा बद्ध मतदाता अपने मताधिकार दा इस्तेमाल करियै करगंन। दुए ते खीरी चरण दा मतदान 11 नवम्बर गी करोआया जाग। वोटें दी गिनतरी इस महीने दी 14 तरीक गी करोआई जाग।

<><><><><><>

## Jitender-Singh

कार्मिक, लोक शकैत ते पिंशन राज्यमंत्री डॉक्टर जितेंद्र सिंह होरें अज्ज आखेआ जे 25 लक्ख शा बद्ध लोकें अपना डिजिटल जीवन प्रमाणपत्र बनाने ताई चेहरा पंछान प्रणाली-फेस आर्थेटिकेशन अपनाई ऐ। नमीं दिल्ली च चौथे राश्ट्रव्यापी डिजिटल जीवन प्रमाण पत्र अभियान दे उद्घाटन मौके डॉ. सिंह होरें एह गल्ल आक्खी। श्री सिंह होरें इब्बी दस्सेआ जे अभियान इस महीने दे खीरै तगर जारी रौहग। उनें इस अभियान पर इक पुस्तक ते लघु फिल्म दा विमोचन बी कीता।

<><><><><><>

## Army

भारती सेना नै उधमपुर जिले दे डुडु बसंत इलाके दे फुलुंगू गांs च इक मुफ्त मेडिकल कैंप दा आयोजन कीता ते दूर-दरेडे इलाकें च स्थानीय समुदायें दी बेहबूदी ते बेहतरी दा अपना धेय्या फही पक्का कीता। इस पहलकदमी दा मकसद दूर-दरेडे गाएं च बसने आहले लोकें गी उंदे घरें कश सेहत सेवा उपलब्ध करोआना ऐ। कैंप दरान भारती सेना दे मेडिकल अधिकारिएं ते सेहत अमले नै लोकें दे जरूरी चेक-अप कीते ते मुफ्त दोआइयां बंडियां ते सेहत, सफाई-सुथराई ते एहतियाती सांभ सम्भाल बारें जागरूक कीता।

Gurupurab

सिख धर्म दे संस्थापक गुरु नानक देव जी हुंदा 556मां प्रकाशोत्सव धार्मिक उत्साह कन्नै मनाया जा करदा ऐ। 1469 च कते म्हीने दी पुण्णिया आहले ध्याड़े लाहौर च राय थेई दी तलवंडी, जिसी हुन ननकाना साहब आखेआ जंदा ऐ च पैदा होए दे गुरु नानक जी इक्क महान आध्यात्मिक गुरु हे। उन्नै लोकें गी इक ईश्वर, ईमानदार, दयालु ते मदाद करने आहला जीवन जीने दे महत्व बारै सखाने च अपना समूलचा जीवन समर्पित करी दिता। उंदियां शिक्षा इस गल्ला पर जोर दिंदियां न जे सब्बै मनुक्ख इक्क बरोबर न। जम्मू च श्री प्रकाश पर्व मनांदे होई लोक बड़ी मती गिनतरी च गुरुद्वारें च मत्था टैकारदे न। मुख समारोह बीबी चांद कौर गुरुद्वारे च आयोजित कीता गेआ हा। शुरुआत जित्थे अज्ज बड्डलै नगर कीर्तन ते अखंड पाठ कन्नै होई। संगत लेई पूरे दिन लंगर दी टकोहदा बवस्था कीती गेदी ही। एहदे अलावा हिंदू धर्म दी नेकें बिरादरियें अज्ज जम्मू च अपने-अपने कुलदेवता या कुल देवी दे थानें पर सलाना मेल दा सरिस्ता कीता जित्थे लोकें टकोहदा करियें नमें बयाए दे जोड़ें देवी-देवताएं सामने मत्था टेकिये सुख-शांति दी प्रार्थना कीती। उपराज्यपाल मनोज सिन्हा ते मुखमंत्रि उमर अब्दुल्ला होरें गुरु नानक देव जी हुंदे प्रकाश पर्व पर लोकें गी बधाई दिती ऐ। उन्नै लोकें गी गुरु हुंदियें शिक्षा दी पालमा करने ते अमन-रमानदारी दे अलावा आपसी भाईचारे आहले मुल्लें गी बनाई रखने दी अपील कीती।

**BSF Sunil Sheety**

बालीवुड दे मशहूर अदाकार ते फिटनेस प्रेमी सुनील शेटी होरें देस भर दे लोकें अगगै इक्क भावें भरोची अपील कीती ऐ जेदे च उन्नै जम्मू बी.एस.एफ मैराथन 2025 च शामिल होने दी अपील कीती ऐ। तारे 9 नवम्बर गी होने आहली ए द्रौड़ मैराथन थमां बदियै एकता, फिटनेस ते देसे दी सरहदें दी राक्खी च तैनात बी.एस.एफ दी अदम्य दिलेरी बक्खी इक्क अनट्रुट शरदांजलि दा उत्सव होग। मैराथन शा पैहले बी.एस.एफ 7 ते 8 नवम्बर गी दपैहरी 12 बजे शा संजा 5 बजे तगर शहीद वीर देव स्टेडियम बी.एस.एफ पलोड़ा जम्मू च इक्क मेले दा बी सरिस्ता करोग। मैराथन एक्सपो दा मकसद इस आयोजन शा पैहले एदे च हिस्सा लैने आहलें, मुख-मुख खेड मार्के ते फिटनेस प्रेमियें गी कन्नै लेयाना ऐ। मैराथन च शामिल होने लोकें गी छीती पर लाने आले नम्बर ते आधिकारिक टी-शर्ट तकसीम कीतियां जागंन।

POJK-Power Shortages

पाकिस्तान दे नजैज कब्जे आहले जम्मू-कश्मीर दे मुजफ्फराबाद दे बसनीक अरबां रपें दी नीलम झेलम पनबिजली परियोजना दे होंदे होई बी लगातार बिजली दी सख्त कमी ते कटौती झल्ला'रदे न। मुजफ्फराबाद बपारी संगठन दे साबका अध्यक्ष सरदार अब्दुल रज्जाक खान होरें एहदे पर परेशानी जाहिर कीती जे एह परियोजना, जेड़ी किश ब'रें पैहलें शुरू कीती गेई ही, तकनीकी कारणों करी बंद करी दिती गेदी ऐ। स्थानीय बसनीकें इस परियोजना दी तकनीकी खराबी दे माढ़े माली प्रबंधन दी पारदर्शी तरीके नै तफतीश करोआने दी मंग कीती तां जे बुरी चाल्ली प्रभावित होई दी बिजली सप्लाई गी बहाल कीता जाई सकै तां जे रोजमर्रा दे जीवन च बेहतरी आई सकै। स्थानीय लोकें पाकिस्तान पर दोष लांदे होई आखेआ जे ओह पी.ओ.जे.के दे कुदरती संसाधनें दा शोषण करा'रदा ऐ ते बसनीकें गी मुण्डले अधिकार ते सेवां बी नेहीं देआ'रदा।

<><><><><><>

## Weather

जम्मू-कश्मीर दे उप्परले धारी इलाकें च कल रातीं हल्की बर्फबारी दर्ज कीती गेई जिल्ले के प्रदेश दे होर दुए किश हिस्सैं च बरखा होने करियै तापमान च कमी आई ऐ। मौसम विभाग दे निदेशक डॉ. मुख्तार अहमद होरें दस्सेआ जे अज्ज गासै पर बददल घनोए दे रौहडन। कश्मीर खिते दियें नेकें थाहें पर जम्मू खिते च किश-किश थाहें पर हल्के थमां दरम्याने दर्जे दी बरखा या उप्परले इलाकें च बर्फबारी होने दी मेद ऐ। उनें दस्सेआ जे 6 नवंबर थमां 15 नवंबर तगर मौसम खुशक बने दा रौहग।

<><><><><><>

## Mughal-Road

कल होई दी ताजा बर्फबारी मगरा मुगल रोड बाया पीर की गली गी एहतियातन आरजी तौरा पर बंद करी दिता गेआ ऐ। ट्रैफिक मैहकमे दे अफसरें दस्सेआ जे कश्मीर दे शोपियां गी जम्मू दे सरहदी राजौरी-पुंछ जिलें कन्नै जोड़ने आहली मुगल रोड गी बर्फबारी होने परेंत एहतियात दे तौरा पर बंद करी दिता गेआ ऐ। लोकें गी सलाह दिती जंदी ऐ जे जदूं तगर शड़क गड़्डियें दी आओजाई लेई तैयार नेई होई जंदी ओह मुगल रोड पर यात्रा नेई करन।

<><><><><><>

## ICC

अंतराष्ट्रीय क्रिकेट परिषद - आई.सी.सी. नै एशिया कप 2025 दे खताबी मकाबले च भारत खलाफ आचार संहिता दी खलाफवर्जी करने दे इल्जाम च पाकिस्तानी खडारी हैरिस रऊफ पर दौंऊ मैचें दी बंदिश लाई ऐ। रऊफ पर उंदी मैच फीस दा 30 प्रतिशत जुर्माना बी लाया गया ऐ। आई.सी.सी. दे फैसले मगरा तेज गेंदबाज रऊफ दक्खन अफ्रीका खलाफ पाकिस्तान दे पहले दो मैच नेई खेडी सकोग।

<><><><><><>